

1454-XI-13, Arévalo.—Carta de merced a mosén Diego Fajardo, confirmándole el cargo de regidor de Murcia y 600 florines. (A.M.M. Cart. cit., fols. 36v-37r.)

Don Enrique por la graçia de Dios rey de Castilla, de Leon, de Toledo, de Galizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina.

Por fazer bien e merçed a vos mosen Diego Fajardo, mi vasallo, regidor de la çibdad de Murçia, acatando los muchos e buenos serviçios que vos e los de vuestro linaje me avedes fecho e fecistes asy a mi como a los reyes onde yo vengo, e fazedes de cada dia, por esta mi carta vos apruevo e confirmo los seysçientos florines que vos de mi tenedes asentados en los mis libros de juro de heredad sytuados en las rentas de la çibdad de Murçia, para que los ayades e tenedes de aqui adelante e non segund e en la manera e con las facultades que los teniades del rey don Juan de esclareçida memoria, cuya anima Dios aya, mi señor e mi padre. E asy mismo vos confirmo e apruevo el dicho ofiçio de regimiento de la dicha çibdad de Murçia para que lo ayades e tengades de aqui adelante para en toda vuestra vida, segund lo aviades e teniades del dicho rey mi señor e mi padre, que Dios aya.

E por esta mi carta mando a los mis contadores mayores que vos pongan e asienten sy nesçesarios es los dichos florines en los dichos libros, segund los teniades del dicho rey don Juan mi señor e mi padre, que Dios aya. E vos den e libren mi carta de previllejo e los otros recabdos que menester ovieredes para que vos sean librados de las rentas e segund e en la manera que vos eran pagados en tienpo del dicho rey mi señor e mi padre, que Dios aya. E mando asy mismo al conçejo, justiçia, regidores, cavalleros, escuderos, ofiçiales e omes buenos de la dicha çibdad de Murçia que vos ayan por mi regidor de la dicha çibdad e usen con vos el dicho ofiçio de aqui adelante para en toda vuestra vida, segund e en la manera que el dicho rey mi señor e mi padre lo mando por su carta, al tienpo que vos fizo merçed del dicho ofiçio. E los unos sin los otros non fagades ende al por alguna manera, so pena de la mi merçed e de las penas contenidas en las cartas e titulos que tenedes de los dichos florines e en la dicha carta de merçed de dicho regimiento.

Dada en la villa de Arevalo, treze dias de novienbre, año del nascimiento de nuestro Señor Jhesuchristo de mill e quatroçientos e çinquenta e quatro años.

Yo el rey. Yo Alvar Garçia de Çibdad Real, secretario del rey nuestro señor, la escrivi por su mandado. Registrada. Alvar Muñoz. Martin Nuñez.

